



# Larian Amal Penyayang UMP jayakan Kempen Gaya Hidup Sihat

Lebih 600 orang peserta dalam kalangan mahasiswa Universiti Malaysia Pahang (UMP) bersama anak-anak yatim berpeluang menyertai Larian Amal Penyayang di sekitar kampus UMP Pekan bagi menjayakan Kempen Gaya Hidup Sihat dan menyokong usaha Inisiatif Kampus Hijau yang diperkenalkan universiti pada 10 Mei 2014 yang lalu.

Program anjuran Kelab Penyayang dan Majlis Perwakilan Pelajar ini bertujuan menjalinkan hubungan erat antara UMP dan penghuni rumah anak-anak yatim dari Rumah Anak Yatim Permata Camar, Permata Insyirah dan Rumah Amal Hembusan Kasih Sayang sebagai galakan dalam mengamalkan budaya gaya hidup sihat serta mengumpul tabung untuk membantu rumah anak-anak yatim berkenaan.

Lebih menarik larian amal ini turut disertai oleh Fauzi Nawawi seorang pelakon dan pengarah terkenal di Malaysia. Fauzi bersama seorang lagi selebriti Betty Benafe hadir dalam menjayakan program Bicara Santai Bersama Selebriti, yang juga diadakan bersempena program ini.

Berkongsi pengalaman dalam mengamalkan budaya hidup sihat, Fauzi menasihatkan mahasiswa agar bijak membahagikan masa untuk tampil sihat, cergas dan merencana masa

depan untuk berjaya dalam kehidupan.

Begitu juga dengan Betty yang turut berkongsi pengalamannya sewaktu tinggal di kampus dahulu turut mengingatkan mahasiswa agar pandai membahagikan masa dan jangan mudah terpengaruh dengan unsur-unsur negatif sehingga menyebabkan keciciran dalam pengajian.

Bagi pengarah program, Fatin Nabila Sazali berkata, program ini merupakan sebahagian usaha pihaknya dalam menyemai budaya prihatin dalam kalangan mahasiswa UMP untuk mendekati diri dengan masyarakat dan golongan yang memerlukan.

"Mahasiswa berpeluang bermesra dengan anak-anak yatim ini yang sangat memerlukan sokongan dan sentuhan kasih sayang. Selain itu, mahasiswa dapat memberikan anak-anak ini dorongan untuk berjaya dalam kehidupan mereka," katanya.

Dalam program ini, Pengarah Pusat Kokurikulum UMP, Ramle Abid hadir menyampaikan hadiah kepada pemenang program larian. Beliau turut menyerahkan sumbangan RM 1100 bagi setiap rumah anak yatim.

Hadir sama dalam program, Timbalan Pendaftar Pejabat Naib Canselor, Abd. Rahman Haji Safie dan Penasihat Kelab Penyayang, Rozana Sahadan.

